

De Kwakel

De Moerebuuk

Jaorgank 46

Effe gein deenblaad en spuit,
wae gaon door tot ICH fluit !!



ALAAF !!



Vastelaovendj 2011


Mèt Bram en Marloes
veurop,

zètte wae 't Moeërelandj
3 daag oppe kop !

Jeugdprins Bram
&

Jeugdprinses Marloes

De Kwakel



Proklamatie Prins Jack I

Bèste Moeërebuuk, Moeërinne en anger aanwezige,

Ich, prins Jack I, 60^e prins vanne Moerebuuk, gebore en getoge in Èll,
Zoon van Piet van Susse Bèr en Lies van Grete Pierre,
Getrouwdj mèt mien prinses Miranda, Vader van twië zone; Jarno & Milan,
Woeëndj ane Magnoliastraat in Èll, Bewoëner vanne buurt Hoverwei,
Biegestaon door 3 fantastische adjudante: Ruud, Frank en Evert,
Same mèt heur dames Anita, Judie en Tiny,

In 't dageliks leave bèn ich chauffeur/straoler bie straolbedrijf gebr. Cuijpers in Wieërt,
Ich lid bèn van de Raod van Elf en Stichting Spook, In 't prinsewage comité zit, same mèt mien adjudante,
Vaste ober bèn vanne Raod van Elf en de Kapel as die dorst hóbbe,
Leefhóbber van ein good glaas beer en sjaele zeiver,

Ich wins uch allemaol, groeët en klein, eine geweldjige en straolendje vastelaovestied toe.

Ich verklaor bie de gratie van Groeëtvorst Jan, Vorst Henri en de Raod van Elf 't volgendje:

- det ich same mèt mien prinses Miranda, mien adjudante Ruud, Frank, Evert en heur dames Anita, Tiny en Judy deze vastelaovendj veurop zal gaon
- det wae hie same veur zulle gaon mèt bienao 150 jaor vastelaoves ervaring bie de Raod van Elf
- det wae det neet allein doon, mer same mèt de hieële Raod van Elf, jeugdprins Bram, jeugdprinses Marloes en de jeugdgraod
- det wae vanaaf 't Prinsebal tot Aswoonsdig veur uch klaar staon
- det wae dit gaer wille doon mèt zoeëveul meugelik live blaosmuziek
- det bie mien aafwezigheid as ober, emes anges vanne Raod van Elf veur de drank mót zörge
- det ich dao belangeloos mien bónnebeukskes veur besjikbaar stèl, zoeëdet wae geine dorst hove te lieje

Det ich mèt dees daag zal regere inne

Orde van 't STRAOLMENKE

En dit alles ónger mien motto:

**Effe gein deenblaad en spuit,
wae gaon door tot ICH fluit !!**



Èll, 15 december 2010

Bèste Moeëre en Moeërinne,

Wae zeen noe nog zoeë'n drie en ein halve waek van 't Prinsenbal aaf. De proklamatie is al klaar, zelfs de ieëste proof-óngersjeijing inne "Orde van 't Straolmenke", is al door de Prins en zien gevolg goodgekeurdj. Wae hóbbe de leedjes-aovendj al gadj en wètg gae det de winnaars van 't winnendj leedje, Bram en Rick, mien buurjóngens zeen? Wae zagte toen óngerein "waat sjoëen, 't is net of det 't zoeë mót zeen, want ein van mien adjudante, dae trouwes dit jaor ouch nog jubilaris is same mèt zien vrouw, zeen ouch nog allebei paetoeëm en paettante van dees twië jóngens". Wae zeen al 'n paar kieër bie-ein gekómme mèt 't prinse comité, mer ouch mèt mien prinses en ós adjudante en heur dames, 't waas allemaol gezellig en fantasties. Wae hóbbe allein ós kinjer get dèkker nao de oppas mótte doon i.v.m. de vergaderinge. Mer ich weit zeker det die straks, nao de 9^e januari, dit allemaol neet erg gevónje hóbbe. Óngertösse is 't raoje van de noewe Prins al in volle gang. Ich en mien gevolg weite weem de 60^e Prins van 't Moeërelandj weurdj, mer wae moge uch det noch neet zègge. En det is bèst waal oplètte as se op 'n verjaordaagsfieëst bèst of op 'n anger fieëst hie in 't dörp. Wae hóbbe al get minse op 'n dwaalspoor geholpe, nl. ómdet ein van mien adjudante vanaaf januari 2011 inwoeëner van Èll is.

Mien vastelaoveshert begintj steeds sneller te kloppe, want dae 9^e januari kumtj steeds korter bie. Veur mich, mien prinses Miranda en ós gevolg is de vastelaovendj al op 13-12-2010 begónne, nl. de fieëstaovendj vanne carnavalsvereniging. Ouch hie haaj ich de ieëste pries gewónne, net wie aafgeloupe zunjig 9 januari ... wie sjoëen is mich det, toen móste wae al stiekem doon. Noe is de spits d'r aaf, op 't prinsenbal hóbbe wae same mèt 't jeugdprinsepaar de opening van 't vastelaoves seizoen geveerdj. Det hóbbe wae neet allein gedaon mer same mèt uch Moeërebuuk.

As wae d'r same tege-aan gaon, zoeë wie det de lèste jaore gegange is, den moog se geróstj zègge det vastelaovendj laeftj in 't Moeërelandj. Ich wil daoróm alvast ederein bedanke veur al eure inzèt.

Wae Veere Vastelaovendj.

Alaaf, Prins Jack 1^e

Opgeslote !

Stefan en Anita zeen flink aan 't verbouwe gewaestj in 't aoerlik hoos van Anita. Mèt aod op noew waas alles klaor, dus waerdje de vrinj oetgenuedj en kwaam d'r ein veergange menu oppe taofel. D'r

waerdje oetgebreidj gaete en tössedoor móst Marianne van Josh van Hermans nao de wc. Neet echt belaeftj, mer wat mót det mót. Marianne bleef erg lang wèg, en det waerdje opgemerkjt. Mer Marianne haaj al ettelikke kieëre gezagdj det ze thoes nog get móst ophole, dus ze zooëj innegang waal heives gereje zeen. Effe later ging de telefoon en Stefan paktj op. Ane angere kantj vanne lien meldj Marianne det ze oppe wc zitj. "Jeh, en?" dinktj Stefan en hae vreugtj "Mot ich dich Josh effe gaeve?" "Det hoofjt neet," is 't antjwoord "kom mich lever helpe, ich zit op uch wc mer krieg de deur neet ope!"

Zeetj gae mich neet

**Sóms is zwart neet sjoeën**

Aod-prins Henri heet al jaore de sjoorstein vanne sjop verstopjt. Henri klustj gaer en mèt de wintjer veur de deur waerdje 't tied om d'r veur te zörge det t'r 't kechelke weer kost stoke. Dus dae sjoorstein móst gevaegdj waere. Ómdet Henri geine heldj is op huuegdje en ouch vader Jan knikkendje knieje kriegtj as t'r ein leier zuut, waerdje Mart van Stiene d'r bie gevraagdj. Mart kroop 't daak op en portj get mèt eine stek inne sjoorstein. Det leverdje niks op, dus waerdje beslote om d'r water op te zètte. Tamelijk zuver dröppeldje 't water naeve de verstopping door in 't witte ummerke det Henri ónger bie de stoof heel. "Drei de kraan mer wiejer ope, d'r gebeurtj nog niks." Dus de kraan waerdje vol ope gedreitj en inkele tälle later spötj 't water mèt alle vèttige prut door de sjop. De more, de laje vanne wirkbank, de plefón, werkelijk alles zaat ónger de zwarte smurrie! "Dreitj de kraan mer weer toe!"

**Niks inne gate**

Op maandjig mèt de vastelaovendj waas Ruud van Hover flink op stap gewaestj. Wie d'r thoes kwaam móst de hóndj nog efkes d'roet. Neet gaer, mer Ruud reep de hóndj, paktj de reem en löptj ein rundje zoeëdet 't bieëstje zien behoefte kost doon. Wie d'r thoes de oprit opleep veel hum pas op det de reem euver de gróndj sleipdje t'rwiel de hóndj netjes ane angere kantj naeve 'm leep.

**Juuste @dres**

José Willems waas ein fieëstje aan't veurbereie veur zoon Rolf. Ze haaj get leuks gevónje en de organisatie haaj 't e-mailadres van de fieëstnaas nuuedig veur ein speciaal effect. "Jeh," zeet José, "ich kin 't neet oet de kop, mer 't is get mèt ein apestaartje"

**Foute boel**

In juni waas 't vrieët lekker waer en ein paar wichter wore aan 't fantasere euver lekker zwumme nao sjoeël. "Nou," zeet Eefje, dochter van Fer van Linje, "wae zètte dit jaor 't badje neet op. Det is kepot gevore, want nemes woeëj 't oprume nao de zomer van veurig jaor."

**Zake doon**

Tinus van Kunne en Bèr vanne Goor zote bie Marlies ane bar. Op 'n gegaeve moment kwome ze te kalle euver tied en horloges en heives gaon. Zeet Tinus tege Bèr: "Wil se ruile mèt mien horloge? Krieg se d'r nog 10 euro bie!" "Is good," zeet Bèr. Hae geuftj zien horloge aan Tinus en Tinus geuftj Bèr ein tientje. "Ich krieg dien horloge nog," zeet Bèr. "Ich höb hieëlemaol gein horloge," waas 't antjwoord. Nao get gesteggel zeet Tinus tege Bèr: "Wil se dien horloge trökkaope veur 10 euro?" "Nae, waal veur vief," zeet Bèr. "Det doon ich neet, dus de deal bleef wie d'r waas!" Daags d'rnao, wie 't verstandj weer de euverhandj haaj, is Bèr veur 10 euro zien horloge trök gaon hole.

**Telders euver**

Rianne en Mart höbbe ein aafwasmesjien. Mer edere kieër waas 't ein gemertel óm d'r alles in te kriege. Veural mèt de telders gaaf 't ein probleem, want de slinger kwaam dao de hieële tied tege-aan. Op ein gegaeve moment wore ze det meug en ze sjafdje noew, kleiner teierkes aan, meindje ze. Wie ze thoes kwome bleek det ze precies aevegroeët wore. Ein paar waeke later kwaam Mart d'r achter det dae røk ouch klemkes haaj, woemèt ze dae slinger hoeëger koste zètte.



leërlík verdeile



Leon vanne Spar heet twieë hunj die d'r gaer ein bietje verwindj. De bieëstjes wore braaf gewaestj en haje get lekkers verdeendj, dus paktje Leon ein sjinkske en deej det middedor. Mer veur det de bieëstjes get kregre ging d'r maete of de twieë stökskes ouch waal precies geliek wore, zoeëdet ze ouch allebei aevvöl kregre.

Geine paniek!

Micky, de kleine óngernummer, haaj get geldj verdeentj mèt zelfgemaakdje meubelkes. Op advies van mam bracht hae zien cente nao de bank óm ze oppe raekening te storte. Dao stóng hae stóm te kieke want 't apparaat slókdje waal 't geldj op, mer 't saldo waerdje neet groeëter. Wie d'r óm hulp ging vraoge bleek det hae 't breefgeldj in 't gedeiltje veur klotergeldj haaj geduutj. Gelókkig laag 't nog gewuuen ónger inne bak!



Good aafgeloupe.

Inne kwartfinale van 't WK speuldje Nederlandj tege Brazilië op eine zaoterdig. Daezelfdje daag wore Thei en Tina 50 jaor getrouwdj en daoveur waas t'r nateurlik ein mès. De jónges van Benders zote dus ónger de wedstried inne kapel in Thoeër, want dao waas 't te doon. Bietje bale veur die men, mer alleh. 't Waas ein sjoëen mès woeë-in alles good verleep. Tot in eine kieër ... "Shit!" ... galmdje 't door de kapel. Emes haaj via de sms door gekrege det Robinho gescoordj haaj veur de Braziliëne. Ze hóbbe toen toch mer effe ein kaerske aangestoke en det heet nog geholpe ouch!



Sjoëne pries

Ein paar muzikale jónges oet Èll deje mèt aan ein popquiz bie TomTom in Heitse. Ze kwome net neet inne finale, mer mèt heur 4^e plaats haje ze zich good geweerdj en det leverdje ouch nog 'ns 20 cónsumptiebónne op. Det móst geveerdj waere, dus Ron Deckers bestèldje 10 pilskes en meindje te betale mèt heure pries. Mer det ging neet door, want de bónne wore gesponsordj door La Rochelle.



Wisj dj'r al.....

- det Marjan van Knapen gaer de hóndj oetlieëtj, mer den de hóndj neet mètpaktj ómdet 't bieëstje neet wiltj loupe.
- det Vera van Siem en Corinne inentinge móst krieger veurdet ze nao Egypte op vakantie ginge
- det ze toch echt hieël vól last daovan haaj inne linkse erm
- det det erg vreemdj waas, want de spuite wore toch echt rechts gezatte



Gein gezicht



Ed Koenen haaj op 'n gegaeve moment 'ne hooctandj los zitte in zien gebeet. Det waas toch lestig en hae most good oplètte want al ein paar kieër haaj d'r 'm inne móndj bie 't aete. Hae mook dae tandj den zuver en plekdje hum zelf weer vast mèt tieënsecondeliem. Op 'n gegaeve moment ging 't echt fout en slikdje hae dae hooctandj p'r óngelök in. Ed veuldje zich neet op zien gemaak mèt de gedachte det dae tandj in zien lief bleef zitte. En de hieële zomer mèt ein gaat in 't gebeet rónjdjoupe waas al hieëlemaol neet waat t'r woeëj. Dus dao waerdje beslote óm dae tandj mer op te vange as t'r zien groeëte boeëdsjap ging doon. In Wieërt haaj d'r zich ein zeef gekocht waat precies ónger in 't gaat vanne wc pasdje, det kost dus neet fout gaon. Aangezeen Ed 'ne kieër of drie p'r daag móst kost succes neet lang oetblieve. Hae begost den ouch drek dezelfdje daag bie de ieëste beurt mèt zeve. Eine goje houp sjiete en den verzichtig mèt werm water doorspeule. Al de volgendje daag, bie d'n derdje houp ... jaowaal huuer ... dao blónk 't tendje wie 'ne diamant tösse de kole. Ed veuldje zich al drek ein stök gezónjer en mook zien tendje good zuver mèt Prodent veur ein nog witter resultaat. Toen is t'r mer nao zien broor John gereje in Wieërt want dae heet nog baetere liem. Oeteindelijk heet Ed zich toch mer ein noew gebeet laote aanmaete want hae waas nog steeds neet geröstj. Waat t'r mèt 't zeef gedaon heet wete wae neet, mer as uch 'tzelfdje euverkumtj zoeë dj'r 't hum 'ns kinne vraoge. ...



Aafmake?



D'r waas weer 'ne oetbraak van Q-koorts is ós landj. Jo vanne Kaolder haaj in die periode eine verjaordaag in Thoeër. "Ich gaon ze mörge allemaol condolere dao." "Wiezoeë?" vreugtj Jesper. "Jeh, alle geite en buk mótte waere aafgemaaktj!"



Goje sponsor gevónje



Al jaore bringtj JWE eine Èller kalender oet. De wichter gaon daomèt langs de deure óm geldj in 't laetje te bringe. Óm de drókkoste te betale geit de leiding de middestandj langs mèt de vraag of ze wille sponsere. As tegeprestatie weurdj den de naam van 't bedrief oppe kalender gezatte. Jeroen Bongers en Sjack van de Kruisj zeen leiders bie JWE en op heur liestje steit ónger angere de Schoenenhal. De eigenieër daovan woëntj in Èll, naeve de zaal. Jeroen en Sjack wiste det bliekbaar neet. Die belle al jaore bie 't verkieërdje hoes aan, namelijk bie de buurman! 't Sjoëenste is nog waal det ze d'r ouch nog sponsorgeldj los weite te kalle!

Jan van Beurskes 50 jaor

Jan is 50 gewore en det is groeët geveerdj. D'r waerdje tente opgezatte want 'ne houp volk waas genuuedj. De ieeste ging good, dit waas 'n tent van Matje en die waas 8 bie 4 maeter. Mer de ruumdje waas te weinig en dus waerdje nog 'n tent gelieëndj van Piet van Roy mèt ouch dezelfdje aafmaetinge ... dachte die jónges van Beurskes. Dus wie ze die tent ginge opzètte wore d'r neet alle buize bie, dachte ze. Henjig as se zeen moke ze de buize bie, dao waerdje de hieële middig aan gewirktj. Toen oeteindelik 't zeil d'r op móst pasje det neet!! Waat bleek, 't zeil waas 6 bie 3. In eine kieër haje ze toen buize euver.



Spare

Zef vanne Slechter en Chantal van Beurskens wirke same bie Stiene inne appele. Op 'n gegaeve moment zeet Zef: "Zèk, dich wirkst noe al 'n tiedje bie de Spar, ich zeen dich regelmaotig op diene fiets de post rónjbringe, en noe kóm ich dich ouch hie tösse de appele tege. Höb se 't nog nuuedig?" "Jao," is 't antjwoord "want mien poes mót gesteriliseerdj waere."



May toch!

't Waas weer tied veur de jaorlikse aodiezer-actie vanne sjötterrie. D'r waerdje bie 't sjöttiekieëtje soep mèt 'n bruuedje gaete. May van Lowieke haaj good gezörgdj en nao 't aete begóst ze mèt 't oprume vanne soepblikke. "Zoeë, opgeruumdj stiet netjes," zal ze op z'n Wieërts gedachtj höbbe. Leon zaag det en zeet: "May! Wae zitte ós hie kepot te wirke óm get iezer bie-ein te sjörge, en dich goeëtst zoeëmer de blikke bie de voelnis?" "Och leve God," zagt May al drek, "det zal ich waal weer lang mótte huuere!"



't Is 'ne vreemdje zeker, dae verwaaldj is zeker ...

Femke vanne Witte vanne Sjilder heet 'ne knien. Ze is hieël blie mèt 't bieëstje en verzörgtj 'm good. Jaomer genug kóst de knien neet mèt op vekantie, dus ging Femke nao ome Paul bie heur naeve en vroeg hum of hae zoeëlang de knien woeëj verzörge. Paul beloofdje det hae good oppe knien zoeëj lètte en kreeg oetgelagdj woeë 't voor sting, wie-dèk d'r vers water móst gaeve en veural ouch det hae steeds 't hok good móst sloete. De familie waas op vekansie en Paul zaat mèt 'n paar vrinj inne kamer wie d'r inins de knien door de hoof zaag huppele. "Eine witte mèt get zwart oppe rök, det is dae van Femke!" Wie 'ne haas sjoot Paul nao boete en same mèt de rest van 't bezeug ginge ze achter dae knien aan. 't Bieëstje leet zich neet gemèkkelik vange, mer oeteindelik höbbe ze 'm den toch te pakke. Opgelöchtj bracht Paul de knien nao zien hok bie Femke inne hoof. Wie d'r 't hok ope deej kwaam d'r tot de óntdèkking det dao al 'ne knien in zaat! Dae knien dae heur de ganse middig haaj bezig gehaoje waas neet dae van Femke .. want dae zaat gewuuen netjes in zien hökske!



Nog 'ne Abraham

Paul van Beurskes waerdje 50 jaor. En ouch al waas 't eine doordewaekse maandjig, 't fieëst waas d'r neet minder om! 't Waas d'r aojerwèts gezellig en stiekem waerdje 't later en later. Op ein gegaeve moment geit de telefoon bie de Prairie. Ein bietje ongeröstj informeertj Conny of Frank van Miet nog dao is. "Jao," zeet Paul "dae zitj hie tegeneuver mich." "Vraag 'm den mer of d'r heives kintj kómme, want ich mót noe gaon wirke en de wichter staon zoeë op, die mótte nao sjoëel."



Effe biekalle

Op maandjig mèt de vastelaovendj ginge de Prutsers spek mèt eier braoje bie Lianne. Dao bie Evers haje ze toen net eine noewe hóndj gekrege en dao höbbe ze fijn mèt zitte speule. Ein paar maandj later waas Lianne jaorig en de Prutsers wore genuuedj. Tim en Luuk feliciteerdje de jaorige en informeedje nao 't hundje: "Wie geit 't mèt de kief?" "Hieël good, hae is pas nao de kapper gewaesjt," zeet Lianne en wiestj nao heure vriejer.

Beugelbaan preciezie

De beugelclub heet veul noew leje en op dónderdigaovendj is 't hertstikke drök en gezellig tot saoves laat. Op 'ne dónderdig, óm half 2, ginge de lèste heives, Joske van Meerte, Jan van Tis en Peter van Thei vanne Eertweeg. Zeet Joske tege die twieë: "Tot mörge óm 6 oor in Rooj (d'r waas 'ne wèdstried). Beltj op vriedig rónj 6 oor Peter nao Jan: "Zèk Jan, hie in Rooj is nog alles toe, geit dae wèdstried waal door?" "Jao," zeet Jan, "mer neet vandaag, mer zaoterdig". "Wie kan det?" vreugtj Peter, "Jos zagt tot mörge..." Woeë-op Jan antwoordje: "Jao mer 't waas al half 2 snachs, dus 't waas al vriedig..."

Foute daag?

Anouk van Giel en Marleen waas 4 gewore en nao de vekansie ging ze nao sjoëel. Op de maandjig waerdje aafgesproke det Anouk dinsdigs veur 't ieërst nao de TSO (Tösse Sjoëëlse Opvang) zoeëj gaon. Ketj van Mart en Rianne haaj dit gehuurdj en wie de zoemer ging, pakdje ze Anouk bie 'n handj en nóm heur mèt nao de TSO-taofel. Ómdet 't maandjig waas, haaj Anouk gein bótterhamme bie zich. Det waas gein probleem, Ketj deidje waal. Marleen heet boete ein puueske staon wachte veur ze besloot óm toch mer 'ns te gaon kieke woeë Anouk bleef. Tjeh, de wichter kinne de daag vanne waek nog neet...



Oetsleeg Vastelaovesoptocht 2010 van CV De Moerebuuk



1e pries euver alles (wisselbeker) en ouch
1e pries wages mèt 143 puntje.
"Wae make d'r ein zootje van"

- De Prutsers -




2e pries mèt 140,5 puntje :
"Siesta...? Fiesta"
- VV De Zeivermötse -

3e pries mèt 138,5 puntje :
"Wae gokke d'r op"
- VV De Vervaelers -



1e pries klein groepe mèt 134,5 puntje.
"Yes we scan"

- Coup Troep -



2e pries mèt 134 puntje :
"Wae kriege 't ouch spits"
- Des neet verkieërdj -

3e pries mèt 133 puntje :
"Neet lank mer breid"
- De Golden Girls -



1e pries groeëte groepe mèt 137 puntje.
"Waat veur vleis hōbbe wae inne kuup"

- De Platvèsse -



2e pries mèt 131,5 puntje : "Laot Henri mer gewaere"
- De Moeërehieëpe -

3e pries mèt 126 puntje : "Op deze blauwe maandig kleure wae.."
- VC Boetegewoëen -



1e pries alleingangers mèt 136 puntje
"Dit jaor geine polonaise"

Ron van Roij



2e pries mèt 128 puntje : "Optocht sponser"
- Paul Winkelmolen -

3e pries mèt 119,5 puntje : "Ich hōb ze neet alle 7"
- Hub Willekens -

Bèste Moeërebuuk en Moeërinne,



Óm te beginne mótt ich zègge det 't moejlik is óm in 'n klein stökske tekst te verwoorde waat wae allemaol wille zègge, laote wae 't daoróm bie 'n paar hoeëgtepuntje haoje. Al waas de vastelaovendj van 't begin tot 't inj 'n groeët hoeëgtepuntj. Op 3 januari 2010, nao 't aaftraeje van prins Bart en prinses Marjon waas 't zoëë wiet, 't prinsebal vanne Moeërebuuk, de daag det in ós dörpke de noewe prins bekintj gemaaktj ging waere. Net wie de veurgaondig jaore waas ich as vorst aan zét óm 'de noewe' op 'n ludieke meneer teveursien te tovere. Mèt get hulp van René haje wae 'n vraogespel inein gezatte woëdet op 't lèst vanne aafvalrunj de prins euver bleef, en det waas ich zelf, "Prins Henri I". Nao 'n oëververdovendj applaus kreeg ich de microfoon en stèldje ich miene prins Roy veur aan 't volk inne zaal. Veul emoties en hertverwermendje reacties gónsdje door de zaal. 't Waas 'n feit, Henri is prins en hae heet eine prins. Nao 't veurlaeze van mien proklamatie waas 't veur ós en alle Moeërebuuk dudelijk, geine dae d'r ouch mer euver dacht hie meute mèt te hóbbe. Det gevoel heet ós de hieële vastelaovendj en tot vandaag de daag oppe bein gehaoje. As prinsepaar waerdje wae ouch benadertj door de gezèt, en dónderdig veur de vastelaovendj pagina groeët mèt ós gezicht in vief miljoe Spits-gezette staon waas uniek en 'n óngeluefelijk gevoel. De reacties die wae hóbbe moge óntvange vanoet de hieële wereldj, de kaarte, de kadoos, wae kregte 't neet bie-ein genote. As wae de film trök dreie zeen ós de Bontje Aovendje, de oetstepkes nao anger vereininge en de afterparties 't meiste bie gebleve. Vastelaovendj mós se inne cafees vere en den maag 't wc-papeer neet óntbraeke...


't Prinsesjap is veur ós allebei 'n geweldjige ervaring gewaestj, en langs deze weeg wille wae alle Moeërebuuk bedanke veur de sjiekste vastelaovendj oeëts. Ein groeët woord van dank aan 't prinsecomitè, de Raod van Elf en de dames, de muziekantje enne Moeërehieëpe veur de groeëte steun en alles waat ze veur ós beteikendj hóbbe. Eine dikke proficiat aan 't jeugdprinsepaar Max en Geertje, de maneer wiedet gae veurop gingtj bie de jeugd heet meinig moeëreboek enthousiast gemaaktj, super !!

Tot slot nog ein apaart weurtje aan ós adjudante: Pieter en Sanne, Berend en Hanneke en Siem en Corine. Zónger uch waas 't ós neet gelóktj, oet de gróndj van ós hert eine dikke merci en dankjewel veur 'ne hieële sjoëne tied same. Danke veur alles !

Prins Henri I en miene prins Roy



Ein vräogske




Op de AED-cursus waerdj de minse gelieërdj det se reanimere bie veurkeur mèt twieë man duist. Reanimere is hel wirke en nao 'n minuut of twieë löptj dich 't zweit inne bilnaod. Daobie is de effectiviteit van dien inspanninge verminderdj. As se den mèt z'n twieëje bèst, kan de angere persoeën 't van dich euvernumme en bes se blie det se effe op aom kinst kómme. Ein vanne cursiste dacht hie effe euver nao en vreugtj: "As se allein bèst, moog se den aevegood twieë minute pauze pakke?"



Inne buurt.

Daisy van Anita van Bart de Louw steit bie Claar van Sijr oppe keukeraam te kloppe. Claar geit nao boete en vreugtj waat t'r is, ze kintj 't maedje neet. Daisy vreugtj woëë Mien en Sjang woëene. Claar löptj mèt heur nao de weeg en wiestj woëë Mien en Sjang woëene. "Den bès se waal op 't woënwagekamp, ich num aan det se dao móst zeen." "Nae," zeet Daisy, "Mien wirktj bie de Prairie en Sjang maaktj auto's." "Oh," zeet Claar "det zeen Mien en Tinus, en det is hienaeve."



Mèt volle gelaot gaon helpe



Jos van Lemme heet de cursus reanimatie en AED gedaon. Hae weurdj regelmaotig opgerope, ouch waal 'ns vanoet zien werk. De lèste kieër kreeg Jos ein sms-je óm te gaon reanimere oppe Remunjseweg, nummer 203. Jos bedacht zich neet, hae paktje de auto en reej via 't Hennensträötje nao de Remunjseweg. Hie móst Jos ein keus make: links of rechts. Hae ging linksop mer zaag al gauw det 't neet good waas. Dus snel gedreitj en toen nao 't goje hoesnummer. "Verdorje," dacht Jos, " 't is inne horetent, dao bèn ich nog noeëts gewaestj." De pliesie en de zekewage kwome d'r ouch al aan. Jos beldje aan en 'n sjaars geklèdj maedje deej ope. "Even geen klandizie meneer," leet ze wete. "Nae," zeet Jos "ich kóm reanimere." En dao laag inderdaad emes en ze wore al ane gang. Toen de pliesie binne kwaam waas dao Rob Lauwers bie. Hae kintj Jos van 't voetballe, en doe zoogs hum dinke, "waat duit dae Jos hie?" Jos zien hulp waas neet mieër nuuedig en hae kreeg van det

maedje ein kaertje mèt. Jos ging heives en gaaf 't kaertje aan Nelly. "Laes dich 'ns waat det is, ich hób miene bril neet op...."

Later vónj Jos det kaertje inne prullebak, 't waas ein 5-ritte kaart!



Vèrfknoebel in ein noew pak

Ed Heijkers haaj zich ein noew pak gekochtj bie Cramers van Asten want hae haaj saoterdes ein belangrieke bie-einkómst. De bóks móst korter gemaaktj (neet te geluive bie Ed) en waerdje later opgehoojdj. Dae zaoterdigaovendj deej Ed 't pak aan mer toen zaat dae knoebel d'r nog in. Carla beldje drek nao Cramers van Asten mer dao waas nateurlik alles toe. Goje raod waas welkom. Carla nog 'ns gebeldj en leet hum hieël lang rinkelè. Op 'n gegaeve moment paktje de baas op en wie hae 't verhaol gehuerdj haaj kwaam d'r drek nao Èll haer mèt de tang veur dae knoebel oet 't pak te hole. Waat ein gooj service, dae mins verdeentj 'ne werme douche.



Lètterlik sjräm

Luuk Custers kwaam op 'ne dinsdigaovendj oppe tennisbaan kieke, hae zaat same mèt Tim in zien sjoëen autoke. Omdat t'r tennisles waerdje gegaeve stónge d'r in det strätöte mieër auto's geparkieërdj. Luuk woeëj ziene auto inne achteroet zètte (en deej det ouch), mer op 't zelfdje moment deej Tim aan ziene kantj de deur al ope óm oet te stappe. De deur schraomdje de auto van Liejan die aan 't lesse waas. Waat Luuk neet wist, waas det Liejan same aan 't lesse waas mèt Carla van Robert, inderdaad..., die vanne pliesie. Dao móste de verzekeringpapere d'rbie gehoordj waere. Ouch ging Carla nog op óngerzeuk rónjdóm de auto's, dao móst niks aan 't toeval euvergelaote waere. Luuk en Tim ginge op 't terras vanne tennisclub zitte en höbbe verplichtj tennisles gekeke, t'rwil pliesie-vrouw Carla alle gegaeves noteerdje. Ze haje zich dae avendj óngetwiefeldj get leuker veurgestèldj. Mer jaomer manne, ein óngelök zitj noe einmaal in ein klein heukske.



Ein sjöp d'r bove op van oma

Mèt Èil-kirmis waas 't fieëst inne kroeg, mer helaas móst Steef de volgendje mörgre vreug op, dus ging hae oppe tied heives. Carolien haaj nog niks gein zin óm te gaon, dus die bleef bie Siem. Wie det ouch zie 't gezeen haaj vroeg ze aan Chrissy de sleutel zoeëdet ze binne kóst oppe Swartbrookstraot. Chrissy zoeëj den later same mèt Geert heives gaon. Effe later sting Carolien ein poeës ane achterdeur te morrele, mer de sleutel pasdje neet! "Shit, waat noe?" dinkt Carolien. Den mót ich mer aanbelle, d'r zitj niks anges op. Nao lang belle waas 't hieële hoes wakker en kost Carolien binne. Ze booj netjes heur excuses aan ómdet ze ederein oet béd gebeldj haaj. "Mer de sleutel pastj neet oppe deur, ich snap ouch neet wie det kan!" leet se nog wete. Totdet bleek det Chrissy de sleutel vanne veurdeur haaj gegaeve!!!! Sangerdaags waerdje lachendj 't verhaol vertèldj bie oma vanne Sjilder. En van heur kreeg Steef ze flink op zien oeëre. 't Staaldje nörges op det hae zien maedje snachs allein heives leet loupe!



Good gaete

Bie Thei en José van Beurskes móste de more van 't hoes oppernoë gevoegdj waere. Op 'ne mörgre waas ein vanne bouwvakkers get ieërder dao. José sting net op 't puntj óm mèt Sparky te gaon loupe, dus steurdje ze dae mins nao de keuke óm zich ein tas koffie te pakke. Hae drónk ziene koffie, óngertösse kwome de collega's ouch en ze ginge aan 't werk. Ouch José kwaam trök, deej de hóndj inne kamer en vertrocht nao heur werk. Tege lunchtied zatte de wirkluj zich ane taofel en pakdje de bótterhamme oet de tas. Behalve dae vreuge vogel, Sparky haaj d'r zien te pakke gekrege en zaat tevreja oppe bank. Alles op! "Jeh," zeet dae man, "ich hoop neet det hae d'r tevöl last van kriegtj, ich haaj nogal pittig belèk oppe mik." En inderdaad, dae vraetzak heet 3 daag loupe köke en borrele en hae stónk versjrikkelik oet zien bek.



Antwoorde vanne 11 versjille vanne foto van Koalderband:
 1. Muziek op blaad
 2. Embleem oppe mös
 3. Ballon mitte bove
 4. 'e' van kaolderband oppe trom
 5. Poes oppe mös mitte achter
 6. Versiering jas muzikant rechts
 7. Vinger op toetse
 8. Siroef ane tróm
 9. Mónjstök
 10. Lètters oppe vlag moerebuuk
 11. Gael vlak vlag Moerebuuk



Waat is hie te zeen?

- Bienao niks, alles is zwart
- Piet heet de verkieërdje bus gepaktj
- Zwarte Piet is incognito oppe fieëstaovendj



Gooj ouge

Mark Custers en Theike Rutjes zeen collega's en op 'n gegaeve moment móste ze same wirke in Indjehove. Vriedes ginge ze tösse de middig ein frietje aete in 't centrum. Tege-euver de friettent laag eine kleierwinkel. "Dju," zeet Theike "kiek dao in dae winkel. Det is nog 'ns ein lekker wief!" Mark móst toegaeve det ze inderdaad gezeen mocht waere. Ze aete wiejer en kalle nog get, tot Theike opmerkjt: "Kiek dao, ze steit d'r nog steeds! Det is echt ein knap vroumes." Ze aete door, raekene aaf en loupe de friettent oet. Bie 't nao boete loupe zeen ze det die vrouw d'r nog steeds steit. Pas wie ze dónderbie kwome zoge ze det 't ein etalagepóp bleek te zeen.



Waerse stool

Toon van Aere Drees heet eine relax-stool gekrege. Zoeë eine super moderne, woeë det se in kinst zitte en ligge, zoeë eine mèt eine steun veur de veut en dae dich zelfs hölptj mèt opstaon oet dae stool. Dit alles is te besteuere mèt 'n aafstandjbedening. Doe hoofst allein mer te gaon zitte en de stool duit de rest. Tenminste, det dacht Toon. Hae geit zitte, duutj oppe knóp en de stool geit hieël langzaam plat. Toon liktj prinsheerlijk en röstj lekker oet. Op 'n gegaeve moment hèltj d'r 't veur gezeen en duutj oppe knóp óm weer rechtop te kómme. Mer waat hae ouch probeerdje, de stool laag plat en bleef plat en Toon kreeg de stool mèt gein meugelijkheid rechtop. Hae heet hieël get toere mótte oethole óm oeteindelik oet dae stool te klumme. 't Is neet bekindj of Toon hum later nog heet kinne 'aafriichte'.





Deur oetstepke

Nelly van Koos van Sentjens haaj kortingsbónne veur de Efteling gespaardj. Ze trómmeldje de jeugdcommissie van de tennisclub op en mèt mer leefst veer wages volgelaje ging 't op Kaatsheuvel aan. 't Waas 'ne sjoeëne daag, ze amuseerdje zich good en óm de daag gezellig aaf te sloete waerdje d'r oppe trökweeg in Wieërt nog same ein frietje gaete. Ómdet 't kirmis waas ginge ze nao

't Frietmenke bie de Philips van Horne. Det is Nelly en Koos d'r vaste friettent in Wieërt. Ein paar waeke later kreeg ederein 'ne brief oppe mat. Ze wore geflitstj oppe Ringbaan Noord in Wieërt, ein diek proces dus! Wèg korting!! Allemaol haje ze ein bón, de eine get deurder as de angere, behalve Nelly en Koos ... die kregen niks! Meugelijk waas heure auto te lieëg? Of kost Nelly hieël good lache nao de camera? Of waas gewuuen de auto te greun?



Die wiltj dich neet mieër zeen!

Jelle Heber ging mèt get vrinj op vekansie in 't zonnige Lloret de Mar. Veul zón, strandj, beer en vroulje dus. Jelle haaj al snel ein maedje bie-ein gedaon en ein paar daag later, nao 'ne aovendj flink stappe, belandje ze bie-ein in béd. Hieël gewuuen, doe telt neet mieër mèt as det neet zoeë is. Ze kurdje en foemeldje get en op 'n gegaeve moment ginge ouch de kleijer oet. Mer toen kreeg de alcohol en 't völ op stap gaon de euverhandj en ... Jelle veel in slaop! Waat 't maedje ouch probeerdje, hae waas mèt gein paerd wakker te kriege.



Snelle BBQ

José en Wim Klaver nuuedje get vrinj oet veur 'ne barbecue op zaoterdigaovendj. José besprijt mèt Wim wie ze 't toch allemaol geregeldj móst kriege. Ze móst namelijk ouch nog de koffers pakke want op maandjig ginge ze op vekansie. Wim pakdje de papere van 't vakantiehuuske d'rbie en wat bleek, ze haje 't huuske al vanaaf zaoterdig geheurdj en neet vanaaf maandjig! De BBQ is toch gewuuen doorgedange en sunjes zeen ze snel op vekansie gedange.




Waat is hie te zeen?

- De dames vanne raod ginge same 'n weekendje weg mèt kerst.
- De dames vanne raod kriege 't heit vanne prins
- Ze woeëje ouch ein roeëj möts...

Wisj dj'r al ...

- det Vera van Siem op voetballe woeëj
- det ze den ouch 'ne eige sticker bie de Spar-voetbalactie meindje te kriege
- det Corry van Pleunis zich ein jaor lank heet ingesmeertj mèt douche-gel
- det ze meindje det 't bodylotion waas
- det ein vanne wichter van Thijs vanne Bekker verteldje det de slechter "Abdijbrood" verkochtj
- det Francien toen hieëlemaal inne stress sjoot
- det 't paniek óm niks waas, want det "Abdijbrood" bleek gewuuen vleis te zeen
- det Quincy en zien vrinj mèt doon ane bóntje kinjermiddig,
- det ze ein drumstökske instudere mèt Lex van Camp
- det ze dao mèt petjes oppe kop haer mótte vanne moders
- det die moders neet wete det petjes oefendrumstèlkes zeen
- det as Fer van Linje Monique Muysers beltj
- det hae den Eric Heijkers ane lien kriegtj
- det det kumtj ómdet Fer det zoeë in ziene telefoon heet staon
- det Rick Benders zien vriendin Elsemie in Spanje ophooldje inne vertrèkhal
- det Elsemie aankwaam inne aankómsthal
- det det effe doordje veurdet Rick 't versjil doorhaaj

Mik of Vleis?




Monique ? Eric ?



Huwelijksreis



Connie en Peter zeen op huwelijksreis gewaestj nao Kreta. Ze höbbe dao van alles óngernome en excursies gedaon. Bie ein excursie ('n aansmeerreisje) moke ze groeëte kans op 'ne pries. Mer ze wore in 'ne roes en huurdje neet waat t'r allemaol gezagdj waerdje bie 't aanbod. Ze ginge mèt 'n bus örges haer, kregen aete en drinke en veul verhaole. Ze wore de kal eigelik allang meuch mer koste neet wèg. Oeteindelik bleek det ze 'ne pries haje gewónne: ein waek in 'n hotel en gratis verblijf op Kreta, det klónk fantastisch. Allein zaat t'r gein vleegeis bie, die koste ze koupe bie die organisatie, en det waas deur. Det höbbe ze dus neet gedaon en ze gaon ouch noeëts mieër mèt zoeëget mèt volges Connie.





Moejlikke aeter

Koen van Jan van Boalders is 'ne moejlikke aeter as 't aankumtj op bôtterhamme. Dao hóbbe ze thoes get mèt te stèlle, mer op sjoëël bie 't euverblieve ouch. Edere kieër probeertj t'r get te verzinne óm mer veural geine bôtterham nao binne te hove wirke. Zoeë haaj d'r 'ne kieër de euverbliefmoder vol trots vertèldj det t'r ziene bôtterham zoeë snel

opgegaete haaj. Det waas nateurlik herstikke good, allein haaj ein anger euverbliefmoder det neet mótte huure want die kintj Koen al get langer... Ze ging 'ns bie hum staon en kreeg snel inne gate det Koen toch weer get anges verzónne haaj. Inderdaad ... 't menke waas op ziene bôtterham gaon zitte! "As se hum óm half ein neet op hóbst den moog se dalik boete neet oppe autopod of fiets," zoeë waerdje hum de aafspraak nog 'ns dudelik gemaaktj. Vrie snel daonao steit Koen op en zeet tege die euverbliefmoder: "Kiek den, noe hób ich hum op!" Zoeëgenaamdj, want noe haaj d'r de bôtterham ónger zien shirtje verstopptj en heel hae d'r ein handj bove-op det ze d'r neet óngeroot veel! 'ne Angere kieër lösdje Jeroen Sieben ziene bôtterham neet. Koen huurdje det en zagt innegang: "Hie Jeroen, den moog se ein stök van miene bôtterham hóbbe." En zoeë mer door. Wae dinke det 't waal good kumtj mèt Koen, as se op dae laeftied al vanalles probeerst den weur se toch 'ne "groeëte jóng".



SPARKY ... DEIL 2

José Beurskes, jao dao is ze weer, ging boeëdsjappe doon. Ze kocht de SPAR leeg en ouch bie Thijs houldje ze 't ein en anger. Thoes aangekómme lagt ze de saucijzebruuedjes oppe motorkap vanne wage, zoeëdet ze ein handj vrie haaj óm de veurdeur ope te make. Dao nao binne, ze ruumdje de boeëdsjappe op, mer vergoot de bruuedjes complieët. Gelökkig heet ze 'ne aardige buurman, dae zaag de bruuedjes ligge en bedacht det die zoeë neet werm zoeëje waere. Hae bracht die bruuedjes dus nao binne, trof dao nemes aan en leet ze toen mer achter oppe taofel. Sparky, de inmiddels beroemdj gewore hóndj, lèdje good op en haaj det gezeen... Later dae daag informeedje buurvrouw May of de bruuedjes haje gesmaaktj. Al gauw veel toen 't kwartje en boete inne hoof troffe ze 't leeg zekske aan..



Ein noew bèd

Erwin Compeer kreeg van buurman Donald ein matras. Die zaat nog noew inne plastic en haaj dus niks geleje. Erwin bedacht zich neet lang, bie ein noew matras huuertj ein noew bèd. "En det gaon ich zelf make!" besloot t'r. De aafmaetinge vanne matras stinge oppe verpakking, daomèt kost hae ane slaag, dus hae begóst drek te klusse. Wie 't bèd nao lange tied eindelijk aaf waas, waerdje 't vol trots oppe slaopkamer inein gezatte. Latteboom d'rin en nateurlijk die noew matras d'rop. Mer die basdie neet! Die waas zeker 20 cm te kort!! Wie d'r 't ging naomaete bleek det de matras hieëlemaal neet de aafmaeting haaj die oppe plastic stóng. Miljaar ... waas t'r Toch weer te snel gewaestj.



Oppe reclame



Sjan en Paul zeen de wc aan 't verbouwe in heur hoes vlak euver de Èllerbrök. In 'ne reclame folder haaj Sjan ein fijn fonteintje gezeen veur 129 euro, dus det ging ze hole bie de Gamma. Nao get rónjgekeke te hóbbe vroeg ze aan ein van de men die dao rónjdjoupe óm hulp. "Ich bèn op zeuk nao die fonteintjes vanne reclame, woeë staon die?" Dae kaerel keek waal hieël slum mer snapdje neet woeë Sjan 't euver haaj. "Mesjien steit in 't magazien nog get, loup mer effe mèt." Dus zie nao achter, sjraveldje euver eine houp pallets en dao stinge get fonteintjes. "Ich hób dit veur 189 euro." 't Waas neet 't fonteintje waat Sjan veur ouge haaj, mer 't waas waal ein leuk dink, dus zeet ze: "Doot mich dae den mer veur 129 euro." Dae vent bleef slum kieke en zagt det t'r det neet kost doon, "dit kostj 189 euro," heel d'r vol. "Jao mer d'r zitj geine kraan op!" zeet Sjan. Dae vent gaaf neet bie en Sjan ouch neet, dus ging Sjan mèt leeg henj nao boete. Waers as se is staptj ze inne wage en riedj heives. Thoes keek ze nog 'ns inne folder, bleek 't ein aanbejing vanne Praxis te zeen!



Wisj dj'r al

- ❖ det Tjeu van Lemme 't óngerhaodsgroepke vanne voetbalclub is gaon versterke naodet t'r inne VUT is gegange
- ❖ det t'r drek d'n ieëste daag te laat kwaam óm get mèt te helpe op 't voetbalveldj
- ❖ det toen de rest van die men sterk d'r euver gedachtj hóbbe óm hum ouch dao mer drek inne VUT te steure
- ❖ det Siem aafgeloupe jaor ein vanne adjudante van prins Henri I waas
- ❖ det 't regelmaotig erg laat waerdje (of hieël vreug as gae wiltj)
- ❖ det 't daoróm kost gebeure det t'r op eine mörge Vera nao sjoëël bracht mèt zien pak nog aan
- ❖ det de leste kieër mèt de Kwakel oetreiking/rónjbringe de Prairie veul te laat ope waas
- ❖ det, wie de café einmaal ope waas, emes van 't Kwakel comité móst helpe koffie en angere drank insjódde
- ❖ det ein sjaop van Harrie Snackers zich haaj opgehangen inne wei
- ❖ det toen emes innegang de noew kebabtent haaj wille belle
- ❖ det Fred en Thea ouch waal 'ns believe plekke, meug of neet meug
- ❖ det det Fred niks oetmeuktj, dae slieëptj toch waal, al is 't ane bar
- ❖ det de noew toestèlle oppe speulveldjes goodgekeurtj zeen
- ❖ det inkele aojers zelf de kabelbaan getestj hóbbe
- ❖ det diezelfdje aojers ouch vinje det se d'r good kinst wippe
- ❖ det Corry van Pleunis en Mia van Glabbeek bie de SPAR ein braodhoon bove heure kop hele óm de gebroeksaanwizing good te kinne leaze
- ❖ det ze daobie 't nuuedige commentaar hóbbe gegaeve, woeërom det oppe ongerkantj móst staon
- ❖ det ze die hoon ouch gewuuen haje kinne omdreie





CV De Moerebuuk Programma Vastelaovendj 2011



Sjriefjtj dit mer alvast oppe klender.

Veur wie laat en zoeë mójtj gae 't Kontaktblad, etc. inne gate haoje.
Aaf en toe 'ns kieke op <http://www.moerebuuk.nl/> kan ouch gein kwaod.

Zaoterdig	22 jan :	Receptie noewe Prins Moerebuuk
Dinsdig	08 feb :	Oefene Bóntje Aovendj
Dónderdig	10 feb :	Oefene Bóntje Aovendj
Zunjig	13 feb :	Kaartverkoup Bóntje Aovendj
Maondjig	14 feb :	Oefene Bóntje Aovendj
Dinsdig	15 feb :	Oefene Bóntje Aovendj
Dónderdig	17 feb :	Generale repetitie Bóntje Aovendj
Vriedig	18 feb :	Bóntje Aovendj
Zaoterdig	19 feb :	Bóntje Aovendj
Zunjig	20 feb :	Senioremiddig
Vriedig	25 feb :	80+ middig Bachelorclub
Dónderdig	03 mrt :	Sleuteleuverdracht jeugd
Vriedig	04 mrt :	Sjoeëlcarnaval
Vriedig	04 mrt :	Sleuteleuverdracht
Zaoterdig	05 mrt :	Optochtnummers aafhole Bachelorclub
Zunjig	06 mrt :	Vastelaovesmès
Zunjig	06 mrt :	Vastelaovendj zunjig mèt chipsbal en aovendjactiviteit
Maondjig	07 mrt :	Vastelaovendj maondjig = OPTOCHT en priesoetrekking
Dinsdig	08 mrt :	Vastelaovendj dinsdig = KINJEROPTOCHT en ... sloete !



Blieve lache Henk,
lèt mer neet op
dae flap.

Natigheid

Jos woeëntj al 'n tiedje oppe Kampstraot en heet dao parkeerplaatse aangelagdje veur twee auto's. Op eine sjoeëne, zónnige zaoterdigmiddig in september staon ein paar recreante mèt de fiets, bie hum naeve de oprit op 't knouppuntjefietsroutebord te kieke. Jos kumtj aanrieje mèt de auto en heet de radio aanstaon. De klassieker "Brandend zand en nergens water" van Gert en Hermien is t'r net op. Jos parkeertj de auto, dreitj allebei de rame ope, zètj de radio keihel, zètj de moter oet en luyptj binne zónger op of óm te kieke. Dit alles inne hoop det die minse dinke "waat is det veur eine flap dae de radio zoeë hel aanlieëtj staon." De minse kinne de grap waal waardere, grinnike get en fietse wiejer. Dae aovendj blieftj 't sjoeën waer en Jos dinktj neet mieër aan zien ope rame. Op zunjigmorge begintj 't te raengele en det duit 't de hieële daag. Jos zien broor kumtj op bezeuk en vreugtj aan Nellie of t'r ein speciaal reje is det ane bieriejkantj de raam nog ope steit? "Waat!" zeet Nellie, "ich hób desmorge ane bestuurderskantj de raam toegedreitj, dae ane angere kantj hób ich neet gezeen." Later kumtj zien broor Jos tege op 't voetbalveldj en zeet hum "waat ein idee óm mèt dit waer de rame ope te laote staon." "Nondedju, ich woeëj ein grap oethole mèt die minse," zeet Jos, "mer ich bèn vergaete de rame toe te dreie." Wie Jos de volgendje daag instapdje óm nao 't werk te gaon haaj d'r drek nate veut. Mer ein gelök haaj d'r, dao waas sjoeëne muziek van Rob de Nijs oppe radio "Zachtjes tikt de regen tegen 't zolderraam"



Zachtjes tikt ...
blub ... blub ...
blub ...



Foute richting

Harrie van Marleen haaj 't al eine tied get inne kneuk dus ging d'r de hóndj oetlaote mèt de fiets. Langs Böskes wèg en via de tennisbaan weer trök. Mer dao steit ein pöölke waat Harrie neet gezeen haaj. Gae veultj 't al aankómme ... de hóndj ging rechs en Harrie links van 't pöölke ... enne reem bleef hange!!
Noe luyptj Harrie nog slechter.

WAF ... WAF ...
Sorry Harrie



Eder jaor weurtj veur de vastelaoves medewerkers van 't lèste seizoen 'ne fieëstaovendj georganizeerdj. Det is den innegang de opening van 't noewe seizoen en op zaoterdig 13 november waas 't zoeë wiet. 't FAC kreeg hulp mèt de organisatie van prins Henri I en ziene prins Roy. De zaal bie de Prairie waas ómgebouwdj nao ein jaore-50-lokatie en ouch de genuuedigdje haje zich in dito stijl verklèdj. Dao lepe vètkuive en petticoats rónjdj, mer ouch rökskes, shirtjes, sliepse, gymsoen en zónnebrille. De ingeheardje DJ leet de bèste muziek oet dae tied huuere woeë neet allein de aojere van genote. Toen ederein binne waas lagt Henri oet det t'r ein böstoeer door Èll op 't programma stóng. En neet zoeëmer 'n bös, mer 'ne echte aoje Ingelse döbbeldèkker. Dao woeëj

Ich zeen
niks ...



ederein waal 'ns ein rundje mèt door Èll make, ouch al waas 't óngerweeg stikkedónkel. De groep waerdje in twee gedeiltj en de opdracht waas óm good oppe borde mèt jaortalle en attribute te lètte óngerweeg. Det waas nuuedig want toen allebei de groepe trök wore begost de quiz mèt vraoge euver Èll. De quiz waas zoeë opgezatte det bie eder fout antjwoord d'r minse aafvele en de oeteindelikke winnaar waas Jack vanne Sus. Mer dao waerdje duchtig gefoeteldj dus is 't nog mer de vraog of Jack echt die ieër verdeendje ... 't Kost de pret neet drökke, de lol, de muziek en 't danse waerdje snel weer opgepaktj en ging nog lang door. Det bruuedje mèt knakworst of gehaktjbal rónjdj middernacht kost ederein den ouch good gebroeke óm weer get op krachte te kómme. En dao waerdje nog meinig drenkske gepaktj en alvast geproostj op 't kómmendje vastelaoves seizoen. Det weurdj zeker weer ein fieëst!





De Bob?

Milan waas mèt mam en nog 'n deil dames nao 't derdje gewaestj kieke. 't Waas sjoëen waer en nao de wèdstried zatte ze zich op 't terras. D'r wore inkele die 'n sigaretje opstake en Monique deej det veur de gezelligheid ouch. Heure zoon Milan bekeek zich det ins, 't waas dudelik gein gebroekelik gezicht mer hae zagt t'r niks van. Wie de manne klaor wore mèt douche en ouch René nao boete kwaam leep Milan gauw nao pap en zagt: "Pap kiek 'ns, mam heet 'n sigaretje...maag die dalik nog waal rieje...?!"

Good naogemaaktj

Jantje van Beurskes waerdje 50 jaor en de familie haaj vanalles oet de kast gehoordj om 'ne sjoëne Abraham ane deur te zètte en de tuin te versere. José haaj geholpe mèt get hapjes te make veur 't fieëst en ze bracht die oppe tied nao de Jasmijnstraot. Wie ze de straot inreej zaag ze eine sjilder oppe leier staon. "Waat stom," dinktj José, "welke flap geit noe op ziene verjaorndaag zien hoes sjildere?"



Beste Moerebuuk en Moerinne,

Waat 'n seizoen waas 2010. 't Seizoen van Prins Henri 1 en ziene prins Roy. Mèt de adjudante Siem, Berend en Pieter en heur dames Corinne, Hanneke en Sanne. Mer ouch 't seizoen van jeugdprins Max en Jeugdprinses Geertje mèt heur adjudante Nikki en Jasper. De Èller vastelaovendj waas TOP!! Dees minse hōbbe dit neet allein kinne doon, ze hōbbe steun gadj van hieël 't dōrp. Daoróm wil ich ederein, mer den ouch ederein, bedanke dae zich op waat veur meneer den ouch heet ingezatte veur de Èller vastelaovendj. Wae hope dèt gae det dit jaor weer dootj. 't Waas veur ós 'n jaor waat driedōbbel dik is geslaagd!!! Ein dink weit ich zeker, dit jaor weurdj weer top anges goeëje wae d'r gewuuen ein sjōpke bove-op. Eine goje Vastelaovendj !


Vorst René



Kaoj lieje

Rianne en Mart van Stiene ginge op wintjersport mèt de auto. Bie de veurbereijing zagt Rianne det Mart effe nao de wage móst kieke, "want de roete bevreeze ane binnekantj". Mart de automonteur wist waal woeë det aan kōst ligge en heet veur vertrèk 't euvel verholpe. Althans ... det meindje d'rl. Óngerweges bleek de auto hieëlemaol neet mieër werm te waere. Neet allein de roete bevrose, mer de ganse wage waerdje neet werm!! Gelökkig haje ze genóg dekes bie zich, zoeëdet de wichter 't werm haje. En zelf hōbbe ze zich de haose aangedaon om te steure.

Richard van Jan van Miet haaj ein zelfdje probleem. Ouch ziene auto haaj meute mèt de verwōrming. Hae zat smōrges ein straolkechelke inne wage veurdet t'r thoes wēgreej.



Zeuk de 11 versjille !
(Oplossinge örges anges in deze Kwakel)



Shit,shit,shit, everal shit.

Det is waat veurig jaor veul minse in Èll repe. Dao zeen beruchdje hunj-oetlaod-plekke in Èll en de eigenieëre van dees hoedere vónje 't waal oké det heure hóndj zien behoefte zoeëmer naeve of zelfs oppe weeg deej. En d'r verder niks mieër mèt deje, zoedet 't oppe door ein sjoeën bieëste bende waerdje op straat. Nao veul geklaag bie de gemeindje zeen ze dao op 't idee gekómme óm op diverse plekke eine shitbak mèt sjeurbuulkes te plaatse. Alles inne hoop det hunjeigenieëre inzeen det 't verder zoeë neet mieër kan, det men de shit van heure hóndj in 'n buulke duit en den inne shitbak goeëjt. Dit heet toch waal 'ne hieële tied gedoordj veurdet ederein 't doorhaaj waat hie de bedoeling van waas. Dao waerdje zelfs shitbuulkes inne hóndjetoilet op 't speulveldj vanne Kunnebeemd gegoeëjt.

Tennisclub wiltj aardgasaansloeting

't Bestuur vanne tennisclub haaj bie Essent 'n aanvraag gedaon veur ein gaasleiding aan te lègge want ze woeëje ouch kinne douche nao 't tennis. De gael buize loge al 'ne maondj langs de paad nao de beugelbaan wie opins de gróndjwarkers vanne Enexsis kwome óm ze inne gróndj te lègge. Mer of ze de tekening oppe kop hóbbe gehaaje ofwaal gein tekening koste laeze, Ellske wèjt 't neet... Mer in eder geval waerdje d'r gein gleuf nao de kantien vanne tennisclub gegrave mer in plaats daarvan waerdje 100 maeter verder bie Pleunis de hieël oprit ope getrokke en waerdje dao de hoofdleiding inne gróndj gelagd. Wiedet tiejes 't grave de bure en zelfs Hein van Seunis de wirkluuj d'r op weze det 't woeënhoes, woeë-det nao gegrave waerdje, allang ein gaasaansloeting haaj, kwaam d'r nog steeds geine op 't idee óm 'ns mèt heure baas te gaon belle óm ein en anger nao te vraoge, mer waerdje d'r stug doorgrave en waal zoeëwiet tot alle leiding op waas. Dus nao 'n gooj 30 maeter, dit eindigdje órges halverwege richting 't hoes, stopdje ze en lagte ze de tegels weer trök en wèg wore ze. Dit gebeurde inne ieëste waek van januari 2010 en Ellske dinktj det 't te make mótt hóbbe gadj mèt 't get te lang doorhaaje van aod op noew van die gravers. Wie krieg se 't anges bedachtj óm dit zoeë te doon. Ouch móst de tennisclub hienao nog ein aantal waeke gedöldj hóbbe ómdet inins de vorst inne gróndj kwaam. Mer oeteindelik is alles good gekómme, bie Pleunis waerdje de leiding weer opgegrave en bie de tennisclub weer ingegrave. 't Kostj effe get, mer jeh, dao hób se den ouch get veur!



Ellske

Kritisch, sjerp en oplèttendj. Det is Ellske. Dees aoj tante duit op heur eige meneer

verslaag van waat ze zoeë-al hie inne buurt heet gezeen of gehuurdj.




Struibeleid

Hopelik heet de gemeindje veur 't huidige wintjsezoen ein baeter struibeleid opgezatte den veurig jaor. Toen móst t'r inins op 5 januari groeët oetgeróktj waere. 't Bleek toen al gauw det 't getuug neet in orde waas en de meiste van de 8 snieëploge 't al snel opgove. 't Gevolg waas det de snieë op veul weeg neet geruumtj kost waere. Dao waerdje zelfs door 'ne zieër oplèttendje mins oet Èll gezeen det 'ne gemeindjewirker mèt 'ne Jeep mèt struier de fietsepaad ane Zwartbrookstraat aan 't struie waas t'rwiel d'r intösse al 10 cm verse snieë op laag. Dit stuurdje dae mins zoeë erg det hae nao dae chauffeur haer is geloupe en hum mèt neet mis te verstaon weurd heet laote wete woeëdet t'r noe waal mèt bezig waas. Det mèt 4 grade ónger nul en 10 cm verse snieë, 't toch waal echt geldj verspilling is óm den nog te struie. De chauffeur goof dae mins den ouch drek groeët geliek, mer hae veurdje ouch mer de opdracht van ziene mieërdere oet....



De sjöp eindelijk inne gróndj

Eindelijk, nao veul jaore soebatte, is 't noe zoeëwiet det t'r gebouwdj weurdj op Steenenbamp. De starters wuueninge zeen klaar, de rest van fase ein is ouch al bienao verkochtj en weurdj t'r al begónne aan 't tweeëde gedeiltje van fase ein. En ózze werme bekker is neet te bang, hae heet 'ne kavel gekochtj van mer leefst 850 maeter groeët, neet te klein dus. Hae wiltj, as det t'r stoptj mèt bakke, gaon hove. Mèt Huub Verhaag heet t'r al aafsprake gemaaktj veur 'ne cursus tuiniere. Allein Francien is 't dao nog neet mèt ins, zie wiltj ein zwumbad van 25 bie 10 maeter zoeëdet ze bane kan trèkke. Daonaeve is 't ouch nog zoeë det wae in Èll d'r nog 'n noew bestemmingsplan bie kriege, en waal ane Kampstraat. Óm Lemmehof gelegaliseerdj te kriege heet de gemeindje bedacht óm Tjeu Geelen oet te koupe. Hae mótt veur 2012 zien hokke aafgebroke hóbbe en daoveur kriegtj t'r drie bouwplaatse trök. En Ellske heet gehuurdj det ouch Marleen en Harrie dao ein noew hoes wille gaon bouwe. Mèt Jan van Lemme heet de gemeindje ouch 'ne deal geslote. Hae mótt nog 'ns vijf hektaar buim pote. Daonao weurdj deze hook verangerdj van "agrarisches gebied" nao "recreatief gebied". As dit allemaol doorgeit den kost dit nog waal 'ns de sjoeënste wiek van Èll waere. Ellske hooptj waal det die noew te bouwe hoeze ouch wit gevèrtj waere zoeëdet de naam "klein Thoeër" ieër weurdj aangedaon.

**Verkieërsborde ...
weegaafsloetinge ...
ómleidinge ...**

't Begóst Ellske al 2 jaor geleje te dazele. Verkieërsborde, weegaafsloetinge en ómleidinge die nörges op slaon en fout zeen. Aafgeloupe jaor mèt de kirmis ouch weer. Ze haje waal ómleidingsborde geplaatstj mer gein weegaafzètting woeëdoor alle verkieërgewoeën doorreej en vervolges bie de bank tege de bótsauto's stil kwaam te staon. Vrachtwage combinaties móste den hieëlemaal trök zètte tot bie Harrie van der Looy. Toen Leon vanne Spar de gemeindje hie-euver beldje zagt dae ambtenieër tege Leon: "Kintj gae zelf neet effe bie Mia van Geenen 'n bord oppe weeg zètte..?" De bezuiniging gaon noe toch waal erg wiet. Of in die waek det de Èll-brök (of Èllbrök ?) is opgeknaptj. 't Waas neet dudelik waat noe aafgeslote waas, de Ell-brök of nateurgebied Ellburg? Ellske meintj det dao toch minse in ós dörp woeëne, wie beveurbieëldj Jan Verstappen, die zich vreuger waal 'ns drök moke óm allemaol die missers. Of zoeëje det soort minse noe ouch gedachtj hóbbe "gae zeuktj 't uch mer oet mèt eur borde, det is neet mien dink!".

Prieze kinjeroptocht 2010

**Aanmoedigingsmoeër**

gewónne door:

Sanne, Mike en Sam

mèt:

Ich bak d'r niks van

**SPAR-cub**

gewónne door:

KVV De BelhamELLS

mèt:

Noe ózze vorst prins is veule wae ós keuning te riek

**Knauwelpries**

gewónne door:

Bram Stelwagen

mèt:

Al dreugtj eine aap eine gouwe rink, 't is en blijftj ein lieëlik dink

Dit is 'n verhaal oet 1970 woeë neet euver gekaldj mocht waere en dus neet inne kwakel is gekómme.

4 Vriegezelle Èllerjónges ginge 'n waek op vakantie. Ze ginge nao Azewijn, det is bie Doetinchem. Dao haaj ein vanne jónges stage geloupe op 'n boorderie en dao waas kirmes. Ze nome niks mèt as de portemonnee enne shag. In Azewijn waerdje flink get beer nao binne gesjódj waat de kastelein ouch opveel. Hae vónj det die Limburgse jónges good kóste zoepe en nao sloetested kreges ze nog flesse beer mèt nao de slaoplaats. Ze slepe bie de boor in 't hui.

Sangerdaags kwome ze d'r achter det dao vèrder hieëlemaal niks te doen waas en ze reje trök nao Èll. In Èll mocht nemes wete det ze al trök wore van vekantie, want ze zoeëje ein waek gaon. Mer geine paniek, ein van die men haaj 'ne sleutel van 't kleidlokaal vanne voetbalclub. Ze hóbbe dus op die hél benk en houte vlonders geslaope. Smörges haje ze stroumendj water veur te douche mer geine handjdoek, dus waerdje allein mer 't gezicht 'n bietje gewasse. Wie ze woeëje vertrèkke móste ze effe wachte want dao waas eine bekindje de hóndj aan 't oetlaote. (Piet van Magda).

Toen reje ze richting Malmedy want dao in 'n pension wore nog mieër jónges van Èll (mèt waal 'n maedje) en det is zeker zoeë gezellig. Toen ze in 't pension aankwome waas det hieëlemaal volgebooktj, mer 't waas t'r waal gezellig. Nao sloetested en verdoufdj door de drank ginge ze nao boete en hóbbe dao ónger de hék geslaope. Smörges begós 't te raengele en zeen ze in 't zwumbad van 't pension gedoke óm neet naat te waere.

Wie de rest vanne waek verloupe is, det is neet bekintj mer ein jaor later zeen ze weer gegange, allein wore ze toen get baeter veurbereidj. Ze haje 'n tent mèt en ginge regelrecht nao Mol. De tent waerdje opgezatte en toen kogelrecht nao Geel want dao haaj Toos vanne Prairie 'n café. Saoves waas ederein zoeë laveloos det ze neet mieër wiste woeë de tent sting en mochte ze bie Toos en Louis blieve slaope.

De volgendje aovendj nuuedje 'n jónk stel, det naeve heur sting oppe camping, de jónges oet óm get macaroni te kómme aete. Det sloge ze neet aaf want ze haje al 'n paar daag allein mer friet gatj. De Èller jónges wore good opgeveudj en nuuedje 't stel oet veur de volgendje aovend bie heur te kómme aete. Wie 't zoeë-wiet waas waerdje d'r knakworste werm gemaaktj. En wie 't stèl vroog of t'r ouch koffie waas waerdje dae gezatte van 't knakworste water, det ging sneller. 't Stèl heet de rest vanne vakantie gein contact mieër gezóchtj mèt die men. Neet te begriepes want d'r wore gein kwaaj weurd gevalle. Trök in Èll hóbbe ze d'r nog dèk mèt mótte lache en det doon wae noe fieërtig jaor later ouch!

**Weurdje vanne redaktie**

Laote wae beginne mèt 't slechte noets. Hub en Corry vinje 't nao 11 oetgaves waal gewaestj en stoppe d'rmèt. Heur biedrages en kritische blik op 't gebeure in Moeërelandj gaon wae misse. Eventueel vervangers mótte van gooj hoeze kómme, det is zeker! De redaktie wiltj langs deze weeg Hub en Corry hertelik bedanke veur al die jaore samewirke, dèk tot in de late eurkes, en wae gaon d'r vanoet det wae aevegood regelmaotig 'n stökske van heur toegesjove krieger. 't Goje noets is det ós vastelaovesblaad nog steeds good gewaardeerdj weurdj door de minse. Alles is den ouch óngevieër bie 't aoje gebleve, allein 't los blaedje is oetgebreidj mèt get puzzels. Gae mójt mer 'ns kieke of det dj'r dao get van kintj make. Weer veul laesplezeer gewinstj!

De Kwakel is ein oetgave van 't Kwakelcomité: Jeanny vanne Kaolder, Corry van Pleunis, Hub vanne Baars, Rianne Goldenbeld, Nicol Orbon en Paul van Miet

Mèt dank aan: Tjeu van Lemme

De Kwakel

PROKLAMATIE VAN JEUGDPRINS BRAM EN JEUGDPRINSES MARLOES

Wae, prins Bram en prinses Marloes, verklaore in 't biezeen van uch 't

Bram



Marloes



Ich zeen uch dinke, woeë is 't'r det eine van,
mer de meiste kinne mich al lang.

Ich bèn prins Bram, zoon van Hans Tertoolen en
Marleen van Rooy

Wae kómme oet Braobandj, dao is 't ouch hieël mooi.

Ich bèn gebore in Frankriek, ouch ein sjoëen landj,
mer ich bèn opgegrudj in ós eige Moeërelandj.

Ich woeën al weer 11 jaor op de Hoeëgstraat,
in de aoj sjoëël, ein huuske waat ich nog lang neet verlaot.



Mien hobby's zeen voetballe mèt de D2
en tennisse doon ich den veur 2.



Mèt "de badjes" doon ich eder jaor mèt,
det is mèt de kinjerbóntjemiddig en de optocht altied dolle
pret.

Bram en Marloes

Same zitte wae op basissjoëël de Verrekieker in groep acht,
dao hóbbe Marieke en Chris ós de hieële daag in heur macht.

Nao sjoëël, MSN-en of X-Boxe wae edere daag,
waat van ós pap en mam mer 'n eurke maag.

Mèt Daphne en Rolf as adjutant,
blijftj 't'r nemes mieër ane kantj.

Ich, Prinses Marloes, aodste dochter van
Ruud van Lowie van Brunester en Annie Corstjens en van
Miriam van Wiel van Thoeëme Pieër en
Annie van Mechele Neel.

Zus van Emmy, miene steun en toeverlaot,
woeënendj in 't Spargelheukske op de Craenenstraat



Mèt streetdance as sport,
kóm ich aan beweging niks te kort.



Wae lieëre zoeë al flink hosse en springe,
daobie doon ich ouch nog mèt 't kinjerkuerke zinge.

Ouch doon ich sóms waal 'ns oppasse,
en dae waat neet loestertj, kriegtj de oeëre gewasse.

Mèt de optocht doon wae altied get make,
dit jaor mót ich hie-in echter verzake.

En dit alles ónger ós motto:

**MÈT BRAM EN MARLOES VEUROP,
ZÈTTE WAE 'T MOEËRELANDJ
3 DAAG OPPE KOP !**

ALAAF !

Gezóngte door: Bram en Rick Camp
Tekst: Monique Muijers
Muziek: Fer Koolen

Titel: Wae hole alles oet de kast...!!!

Refrein

't Is vastelaovendj, klinktj van alle kantje
Den wete wae weer good van wantje
Zoeë geit 't eder jaor op noew
Det spelle wae dich echt neet oppe moew
Waat duis se dich noe toch weer aan
Astronout, cowboy of gewuuen mer indiaan
Want 't is zeker, 't steit vast
't Is Vastelaovendj 't Is Vastelaovendj
Wae hole alles oet de kast!!

Couplet 2:


De optocht geit vertrèkke
Waat kan 't toch verrèkke
Trèk toch snel get oet de kast
Binj die veters toch mer vast
Loup neet naeve dien sjoon
En noe gauw d'r achter aan
Kómaan, kómaan, weem de sjoon pastj trèktj 'm aan

Refrein

Couplet 1:

't Fieëst det geit beginne
Weem kan zoeëget verzinne
Al kin se alles drage
Geis se lever rokkejage
Dus sjaam dich dao neet veur
Kom gaef det den noe mer toe
Dae aap, dae kumtj toch echt waal oet de moew


Refrein



Couplet 3

Kumtj den 't inj van 't fieëst
Dich gedrage as ein bieëst ?
Haat se al die drie fijn daag
Echt ein flink stök inne kraag
En is 't echt gedaon
Oppe zök nao hoes toe gaon
Alaaf, alaaf, dao zaktj ós de bóks van aaf

1x Refrein + 1x lèste twee regels refrein (langzaam)



Mart Kessels Transport

P&F Springkussenverhuur

Clerkx Eierhandel

Eetcafé De Prairie

Coolen Tuinderij BV

DeTra Exclusieve Reizen

Pand 17

Bakkerij Thijs Koolen

Dierenartsenpraktijk Ell

Hans Nies Transport

Landgoed Lemmenhof

Moors Boomkwekerij

Loonbedrijf Van Der Looy

Eertwegh Tegelwerken

Fermate

Stals-Rijks planten en bloemen

slagwerkmuziek ELCEE

SPAR Leon Derksen

Kunstschilder Peter Hermans

Rabobank Ell eo

TnT Audio en Licht verhuur

Kledingatelier Nelly Heijkers

Hondenkennel: De Kraanhoeve

Garage Heemels

Medische Pedicure Toos Mennen

NaturELL Schoonheidssalon Ell

PLATTE KER

Centrum voor Innerlijke Vrede

Mindfulnessstrainingen Indachtig

Willekens Toneeltechniek

Bloemen- en plantenkwekerij Verhaag

Schildersbedrijf Smeets Steyvers

Timmerbedrijf-Houthandel W.Steuten

Boeketten Don en Ilze vd Winkel

Philipsen Fysio- en Sportfysiotherapie

Gypsy Giants: Gypsy & Drum Horses

Pedicure Bep van Oosterhout-Tobben

MOOK motoronderdelen

Fruitbedrijf Moors-Franssen

Tank & Truck Cleaning Weert

Winkelmolen Meubel- Timmerwerken

Zuiderhuis Financiële Dienstverleners

As se de ker trèkst, geis se vroet.

Equijoy

Logopediepraktijk Eva Strous

Frits Vries Transport

Geleuken Infra B.V.

De Bachelorclub

Gestique

Linders Kwekerijen BV

Slagerij Ruud en Marleen Heijkers

Kapsalon Cinderella

Profmarkt.nl

Elltaria

De Schoenenhal

Brennand Computerservice

Truck Color Design

Fruitbedrijf Koppen-Moors

Custers Taaladviezen

Staalbouw Derckx Weert BV

Scissors & Co

Schoonheidssalon Jeanne

WAE

VERE

VASTELAOVENDJ

